

Radyo an Norvys

(<http://www.dasunys.net/podcast.htm>)

Titel: Nowodhow an seythun (23/01/08)

Auctour: Matthew Clarke

Dydh: 23 Genver 2008

Pesyans: 00:02:51

An tan neb a dhistruis an Ostel Pennhalow yn Tewynn Bleustra veu enowys gans nebonan a borbos, henn yw warlergh kedhlow an kreslu.

Ladha a wrug tri ferson, mis Est yw passyes... ytho yma hwithroryon ow leverel bos hemma kas moldra.

Broder Pat Albutt, Peter... ha'y mamm Monica a verwis y'n flammow.

Yma hi owth ynnya tus dhe gewsel dhe'n kreslu mars eus dustuni dhedha.

Yma own yn Kernow bos moy a deyluyow gorrys yn-dann boghesogneth wosa kowethas nerth EDF dhe ughelhe y brisyow.

An kowethas a wre kenwertha yn-dann an hanow SWEB kyns es bos prenys gans an kowethas Frynkek.

Pris an tredan a wra yskynna dre eth kansrann, ha'n pris gas dre beswarthek.

Yma dhyn y'n eur ma kost bras dhe'n dowr ynwedh.

Dew vil ha seyth hag yth esa le a selwyansow gwrys gans an RNLI yn Kernow.

An niverow nowydh a dhiskwa bos an skila rag hemma o an hager awel dres an hav.

Byttegyns, Konteth Karrek o an gwetha ranndir yn Breten Veur Soth West.

Gwithysi Vywnans a grys bos an skila treth Porth Pyran.

Meur a dus yw sowthennys gans an mordid uskis ha froseyow krev yn-dann an dowr.

Skath sawya an moyha bysi o dhe Aberfal.

Pan wovynnir orth an RNLI pyth o an brassa droglamm warlyna... y teu an gorthyb uskis... An Napoli.

Kyn feu trethys war arvor Dewnans, y tallathas an kudynnnow y'n mor ogas dhe'n Lysardh.

Rygbi...

Yth esa gormeul takkya-diwla rag lywydh an Vorladron Gernewek kyns an fit erbynn Newbury.

Milyow a skoedhyoryon eth dhe Gammbronn ha leverel 'dyw genes' dhe Hykka Evans hag ev ow kasa an klub.

Ev a veu herdhys yn-mes dre gaskyrgh hwystra.

Ha'n gwari y honan... An Vorladron a fethas Newbury. Eth-poynt-warn-ugens dhe hwegh.

Ha res o dhe'n Para Oll Du Kernewek dehweles dhe Nuneaton dhe'n bennseythun yw passyes.

I eth ena an bennseythun kyns heb gwari drefenn bos fowt dhe'n lugern bras.

Fit dhe-les o drefenn bos pub para Kernewek arall fethys y'n Piwas EDF.

Fit feusik o dhe Lannstefan... I a waynyas unn-poynt-ha-dew-ugens dhe beswarthek.

Ha gans henna ...yth yw diwedh a'n nowodhow ..ha prys leverel...tereba nessa.